

Na osnovu člana 4.2 i 4.7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 33. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 51. stav 8. Pravilnika o licencama – Prečišćeni tekst ("Službeni glasnik BiH", broj 63/16), na inicijativu Državne regulatorne komisije za električnu energiju, na sjednici Državne regulatorne komisije za električnu energiju, održanoj 16. maja 2019. godine, donijeta je

ODLUKA

O SUSPENZIJI PRIVREMENE LICENCE ZA OBAVLJANJE DJELATNOSTI MEĐUNARODNE TRGOVINE ELEKTRIČNOM ENERGIJOM

1. Društvu "Vitol Adriatik", d.o.o. Sarajevo, suspendira se privremena licenca za obavljanje djelatnosti međunarodne trgovine električnom energijom, izdata Odlukom broj 05-28-12-400-17/17, zbog naročitih kršenja odredbi uvjeta za korištenje licence.
2. Licenca iz tačke 1. ove odluke se suspendira od 15. aprila 2019. godine do daljnjeg.
3. Za vrijeme suspenzije licence Društvo "Vitol Adriatik" nema obavezu plaćanja regulatorne naknade.
4. Ova odluka stupa na snagu danom donošenja i bit će objavljena u "Službenom glasniku BiH" i službenim glasilima entiteta.

Obrazloženje

Društvu "Vitol Adriatik", d.o.o. Sarajevo (u daljnjem tekstu: vlasnik licence) je Odlukom Državne regulatorne komisije za električnu energiju (DERK) broj 05-28-12-400-17/17 od 13. marta 2018. godine, izdata privremena licenca za obavljanje djelatnosti međunarodne trgovine električnom energijom na period od 24. marta 2018. godine do 23. marta 2020. godine.

Članom 17. stav 3. Pravilnika o licencama – Prečišćeni tekst, propisana je obaveza plaćanja regulatorne naknade tokom trajanja licence. Shodno tome, Rješenjem o plaćanju regulatorne naknade za 2019. godinu broj 05-28-12-370-7/18 od 18. decembra 2019. godine, vlasniku licence je naloženo plaćanje regulatorne naknade za 2019. godinu u iznosu od 26.000,00 KM, kvartalno unaprijed, u četiri jednaka dijela. Shodno pravilnikom propisanoj dinamici izmirenja ove obaveze, istim Rješenjem je utvrđeno da je rok plaćanja obaveze za I kvartal 2019. godine 31. januar 2019. godine, a za II kvartal 2019. godine 31. mart 2019. godine. Međutim, vlasnik licence u naloženom roku, niti naknadno, nije izmirio ove obaveze.

Vlasnik licence obratio se DERK-u putem punomoćnika podneskom od 12. aprila 2019. godine, zaprimljenim 15. aprila 2019. godine pod brojem 05-28-12-174-1/19, kojim se DERK obavještava da je vlasnik licence prestao sa radom 1. aprila 2019. godine, te da je nadležnom sudu podnijet prijedlog za pokretanje likvidacionog postupka. Uz podnesak su priloženi relevantni dokumenti kojim se dokazuju ove činjenice. Istim podneskom se od DERK-a tražila informacija o aktivnostima koje je potrebno poduzeti s ciljem ukidanja licence, kao i obavezama u pogledu plaćanja regulatorne naknade, s obzirom na činjenicu prestanka rada vlasnika licence. DERK je po traženju ovih informacija, svojim aktom od 29. aprila 2019. godine, punomoćnika vlasnika licence obavijestio o potrebnim radnjama i visini dugovanja, ali obaveze po osnovu regulatorne naknade nisu izmirene.

Polazeći od okolnosti prestanka rada vlasnika licence i pokretanja postupka likvidacije pred nadležnim sudom koje su potvrđene i izostankom obavljanja licencirane djelatnosti od 1. aprila

2019. godine, kao i činjenicu da je DERK informiran o prestanku rada vlasnika licence 15. aprila 2019. godine, DERK je stanovišta da nema zapreke suspendirati licencu unatrag, odnosno od 15. aprila 2019. godine kao dana saznanja za okolnost prestanka rada. Ovakvom stanovištu doprinosi i činjenica da je suspendiranje licence počev od 15. aprila 2019. godine u interesu, a ne na štetu vlasnika licence.

Imajući u vidu regulatornim pravilima propisane ovlasti DERK-a da suspendira licencu bez obavljanja javne rasprave u slučaju naročitog kršenja odredbi uvjeta za korištenje licence, uključujući i propuštanje plaćanja regulatorne naknade, to je na osnovu člana 51. stav 7. i 8. Pravilnika o licencama – Prečišćeni tekst, odlučeno kao u dispozitivu ove odluke.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema odluke.

Broj: 05-28-12-174-4/19

16. maja 2019. godine

Tuzla

Predsjedavajući Komisije

Milorad Tuševljak